

百
柱
堂
全
集

百柱堂全集卷二十一 辛酉 壬戌

監利王柏心子壽著

涵碧亭歌爲東鄰陳仲鳴作

岷江怒蹴峽門坼荆渚西來吞夢澤林開岸豁波始平萬里
浮天混空碧君家亭子臨滄洲日向清江甌碧流入表只看
雙鏡合九霄不見片雲浮冉冉孤帆去未停飛來白鷺破空
冥羣山隔岸如爭渡無數芙蓉倒影青知君逸興嗜豪放對
此襟情益空曠澄江如練眼中詩高詠元暉差可抗螺洲釣
叟住西鄰未識茲亭孰主賓濯纓借取亭前水盪洗胸中十
斛塵

澄秋閣歌亦爲仲鳴作

長江湛湛渺何極天下無如此秋色平鋪匹練迴連空隔岸
青山排鳳翼皎皎飛來孤月輪波文散作黃金鱗光通河漢
層霄界漲合滄溟萬里津江閣陳郎逸氣生坐收萬景皆澄
清高天鴻雁羣初起幽壑龍蠹臥不驚此中占斷秋光美借
君江閣日徙倚一碧空明接天水世閒何處着塵滓我心曠
蕩亦如此

桃花澗

與下一首亦爲仲鳴所作

疑有秦人洞仙源此路分壺中澄碧玉天外墮紅雲豔影迎
朝露香風送夕曛漁郎猶可問招隱欲從君

白蓮沼

素面淨無華西施住若耶試看中夜月不辨一池花涼雪侵
衣袂明璫映浦沙冰甌浮玉醴高宴水仙家

入夏以來恆陰而月繼之風雨

訝此正陽月翻教蒙氣乘風驚羣木拔雨助百川騰宿靄乾
坤合清寒日夜增誰扶紅旭出復旦變休徵

倉皇惟調發筦權日艱難專閩丹心痺連城白骨殘貪狼仍
莫制妖蜃復相干獨發愁霖唱憂來非一端

熊仲放貽示雨中見懷詩閱日仍過訪講舍賦此奉謝

離居當仲夏高唱發愁霖頻下憂時淚仍勞望遠心煙生朝

幌暗雲結夕城陰直待逢開齋蹙然命足音

詩歌皆變雅風景似新亭日暮雙窮士時危兩客星便從商
皓隱莫作楚臣醒回首人閒世瀆風逸大庭

姚生行贈姚訥夫茂才

威鳳不得遊卷阿江湖鴻鵠愁網羅露申辛夷悴蘭蕙坎壈
奈汝姚生何漁父蘆中渡窮士穰侯駐車索客子古來亡命
多豪英我見姚生亦如此姚生苦調聲蒼涼冰蠶之繭緝空
桑津妾緹縈志並苦仰天太息飛繁霜君不見鐵額蚩尤率
猛獸乾坤大縱龍蛇鬪十年流血成丹渠帶甲如雲不能救
又不見鉤陳北指陰山下羽蓋霓旌頓中野鱗族揚兵閭闔

門九門誰是當關者宗周嫠婦潛沾襟魯國處女猶哀吟天
柱搖搖地維裂忍視神州將陸沈姚生勿嗟身見翁何不請
纓戮鮫蜃區區仇怨皆牛毛枕戈當雪國家憤臨江節士彼
何人爲子高歌天馬引

寄龔子貞學博

故人龔博士豪氣未銷除中歲棄官去城南歸敝廬逃名蓬
藿徑結舍莽榛墟炯炯目雙炬銜杯且讀書

皇輿猶播越赤縣徧旌旂征權飢逾督人才亂更稀橫流終
不息命駕欲何歸知爾憂時作悲歌淚滿衣

驟雨

南風助鬱蒸，倏忽妬陰乘。民愠何嘗解，山雲已驟興。雨兼愁
不斷，水與寇同增。若問靈修意，蒼茫未可憑。

對月

鄂州南塞少防兵，九嶺烽煙入夜驚。愁絕月華流照處，連山
吹角赤眉營。

南望

南望千山虎兕行，深愁難限賊縱橫。誰知澤國憑天塹，猶勝
熊貔十萬兵。

寄訊耀卿

萬國皆戎馬，恆虞相見難。登樓多攬涕，開徑少追懽。漸報烽

煙偏仍聞士卒單岬嶮懸九嶺誰用一泥丸

九嶺在崇通境江右與楚南北

界嶺也

諸侯停貢士行在滯邊州風雨雞鳴夜乾坤虎關秋荷蘭榮
礪路叢桂被巖幽往問岐山鶯何年阿閣遊

雙烈詞

弔江夏隗氏嫂姑作

刀光照城如白虹明日破城流血紅嫂姑先夜死相誓縋城
並赴清波中浮屍兩兩出沙脊火焚岷岡雙白壁紫煙不散
衝雲霄化作天門補天石

家書至

臨江焚掠昔年同何意音書次第通望裏家懸烽燧畔愁邊

心裂鼓鼙中一丸不塞關門險百戰徒勞鬪將功旋旆皖南
能速救老羸當道貉羣空

筍生

幾日錦綉脫森然破碧苔少年矜節槩寒地擢人才欲共蒼
龍化將招翠鳳來新陰能卻暑幽賞助徘徊

莫愁春泛圖爲龔生星槎題

盧女門藏烏柏裏春波日日鴛鴦起芳名不下苾蘿村來往
石城雙艇子千載湖波冉冉香春花春水泛春航啼鳥不見
珊瑚鏡棲燕難尋玳瑁梁蕭家亦是英雄主宮體相沿成樂
府青絲白馬壽陽來金粉南朝變灰土龔生年少擅才多慨

想風流委逝波哀樂古今相倚伏蒼涼不覺發悲歌悲歌未
竟烽煙逼郊野豺狼薦荆棘白雪雄風兩寂寥江山也帶愁
人色嗚呼戎馬無時休近日王綱甚綴旒乘風合起宗元幹
擊楫能無祖豫州年少終期濟世英幾時伏闕請長纓刺鯨
殪兇丈夫事何用低徊兒女情

雜感六首

帝臺雲氣晦冥冥日奏鈞天夢未醒世外蓬萊臨淺水古來
杯酒勸長星路送谷口兼商岫風遛華胥與大庭空際鶴鳴
殊自樂只餘孤鶴淚交零

居重高臨拱極同黃圖無過

帝京雄貂蟬入座環

丹陛龍虎諸軍衛

紫宮

鸞輅豈宜輕跋涉驪山誰道避兵戎垂堂重閉能無戒直北
關山淚眼中

椎埋惡少弄潢池豈有梟雄命世姿斧鉞未伸司馬法樓船
空老上游師權分列鎮誰先赴銳折長圍不用奇在昔義貞
摧百萬曾聞旋旆未淹時

人才筦庫徧搜羅桑孔功逾頗牧多不惜黃金求買關須回
紅日並揮戈淪州覆郡仍如故竭澤焚林後若何青犢縱橫

猶滿地滔滔權算委頽波

煌煌青紫易錢刀談笑分符復擁旄
民爵秦時盈里巷武功漢代徧鄉豪
但期計日軍儲足安用停年選格勞
僉倚豐財平寇盜私憂巧宦括脂膏

窮髮奇肱混職方開局撤盡九州防
介鱗上湧樓臺氣戎馬中開樵市場
天下倒懸驚未有域中包禍歎非常
周家德厚形偏弱微管千年獨感傷

星變

李質紫宮出南衝天漢津晏嬰垂涕日
劉向拊心辰可弛衣袂戒誰將封事
陳葵棕無路獻况隔塞垣塵

得韓叔起比部書卻寄

一紙書傳豺虎窟廿年遊散鳳凰城
愁看寓縣皆榛莽厭說風塵尚甲兵
九伐終期

王奮武

六飛誰奉

帝還京潛郎相望淪江海未得馳驅並請纓

十年無策靖干戈奈此黃巾白馬何方鎮
猶嗟人傑少交遊翻惜鬼雄多
嗣宗廣武徒聞歎越石扶風只放歌
去去商顏堪把袂芝華無數被巖阿

詠古放言得絕句十九首

黃塵碧海幻滄桑走馬千年速電光蕩蕩天門高不問投壺
日醉帝臺觴

誰遣蚩尤造五兵冀州貔虎角爲城握奇能整軒轅陣終仗
天威一掃平

鄩灌戈過殄滅同妣王再造復卑宮誰知他日璇臺宴忘卻
艱難一旅功

中葉共球九域虔湯孫最數武丁賢若非奮發歌殷武誰戴
聲靈六百年

眼看豐鎬等塵埃穆滿馳心出九垓瑤水弇山仍不足中天
更上化人臺

興歌雲漢閔鴻嗷淮浦徐方敢繹騷但得君王修政治自然
申甫降崧高

宮中夜宴絕長纓雲夢田遊日抗旌隱語果能通諷諫三年
大鳥遂飛鳴

大漢何言頗牧無守文天子有雄圖宮中拊髀求良將緩急
終能得亞夫

危詞頗類屈原風不惜亡身自發忠炎運漸衰雄失據搯須
誰憶息夫躬

爭嘲洛下書生詠誰識隆中梁父吟獨立茫茫遺響絕風雲
終古任銷沈

祖逖雖亡陶侃在遙傳石勒憚威名如何竟讓桓元子北伐
終能抗表行

高齊將士尙雲屯百戰何難保太原馬首只思趨突厥匆匆
夜斬五龍門

千村萬落莽邱墟尙自多端蠹不除直揭郇模三十字猶賢
痛哭萬言書

恪佐前燕猛相秦功安一國作宗臣石郎但有桑維翰也自
存亡繫此人

長樂疏鐘動曉河朝天往日想鳴珂宮槐帶雨成秋色不及
恩光塞柳多

榮杲誅擒才數月
角梁梟滅未淹時
十年狂醜稽礎斧
不道兵家貴巧遲

介胃盡間生蠹蟲
兜鍪頻見出貂蟬
揮金養士非求鬪
掘塹長圍不計年

誰憐國士困塵埃
草沒燕昭市駿臺
樂毅劇辛成朽骨
摸金搜粟盡奇才

岸上磨牙逃猛虎
江閒掉尾憚鯨魚
君看滄海橫流日
何地猶堪宿露車

中宵雷雨大作

先是問江漢間夸麻一旦徙去

豐隆奮怒挾天兵
蜃市鮫宮一夕傾
風雨連江驅萬怪
雙流

如鏡曉波平

金光電劃九天開
燒盡鯨鯢骨作灰
京觀定當齊碣石
海神高起鬪鼉臺

題楊利叔新議後

初訝舌端馳衍爽
徐驚心計過研桑
鑿空將欲籠山海
畫地眞能變富強
平準特開千載局
菁華不竭九州藏
豐財尅日旋龕亂
只合論功首智囊

朝霞有異色賦之

朝霞金鷲鷲作勢欲翽飛
近日疑含瑞垂天尙覽輝
長風吹不散瀾氣馭安歸
鍊液思丹訣晨光髮正晞

南郡送舍弟子章歸里

涼風散秋暑歸權載湖雲久客吾方倦連牀汝又分疏蟬鳴
漸欲新雁起爲羣想到荆扉日慈闈笑語欣

羈館

年光容易送秋期羈館蕭條隱几時撼撼驚風墮鄰棗冥冥
細雨浥園葵賓鴻客燕如相競朽蠹乾螢未有奇掩卷只餘
歸興切故山蘿桂繫人思

雨中庭桂始放

今年秋始半金粟綻深叢藥壯還因露香高不藉風疏鐙凭
檻際細雨閉門中三五佳期近嬋娟或許同

中秋雨夕

姮娥怯風雨故遣密雲遮徑滑苔全溼庭虛桂自花暗蛩攙
夜柝新雁避汀沙寂寂高城裏笙歌亦未譁

飛龍引

九十六君安在哉幽州惟有軒轅臺軒轅合符北出塞法駕
遠陟崆峒來飛龍雲際垂翩翩乘之直上游青天從臣攀揖
莫能及伏地雨泣空潛然生前神鼎棄不顧華蓋鉤陳渺何
處海澗山移日墜淵閩闔沈沈但蒼霧解進祈招少祭公何
如八駿返祇宮藏弓瘞劍萬年恨嗚咽橋山風雨中

獨飲叢桂下

金風撼叢桂黃雪糝莓苔涼月又將墮幽人殊未來深宵寒
綺幌孤興覆瓊杯招隱故山約空令猿鶴猜

九日招同淵甫箴三星堂耀卿諸子會飲並以歌詞相投授
筆和之

百年勝日不常有天送晴光作重九古城地僻少高山只合
攜尊共良友九秋風物亦清美楚客悲來未能止感時草木
多變衰何況九州百郡半荆杞軒后乘雲去不返白雲渺渺
九疑遠日車天路誰當扶壯士拊膺恨年晚高會相逢皆俊
英蕭辰無故百憂生空磨出匣倚天劍但縱高歌裂石聲君
不見寄奴昔定南燕回九日曾登戲馬臺酒熟茱萸饗軍士

英風仗鉞何雄哉，又不見晉家北伐桓宣武。曾清河洛逐羌虜，歸來賓佐宴龍山。意氣風流足千古，英雄往事浮雲沒。世難何堪多戰伐，諸君慷慨志澄清。我已蹉跎凋白髮，對酒猶嗟板蕩辰百壺。倒盡莫浚巡新亭座上，同收淚須見神州戮力人。

客思

寥空清迥足徘徊，望遠無端客思哀。晚歲艱虞逢戰伐，秋風搖落到人才。

宮保胡公新沒

乾坤復覩

皇輿建

闔闔仍依紫塞開，誰贊惟新扶

景運

諸陵王氣鬱佳哉

九日張生繼堂率園丁肩竹至種之階下

此君同結歲寒盟
剛贈琅玕見汝情
來歲重陽值風雨
小窗助我答秋聲

九日燿卿餽菊尙含蕊
未花

黃花九日放猶遲
特遣尊前慰所思
似泉明方漉酒
甕邊醉眼未開時

輓官保胡大中丞排律八十韻

雄俊天何奪艱難
世未夷事同畱
守恨功惜豫州隳
九折輪

摧阪干鈞繫絕廩生當圭卣錫沒作鼓鼙思開府初拔鄂揚
旌獨誓師燎原氛正惡堅壁陣難移檄草無淹暑軍符甚亂
絲多艱環慮灼眾勦萃肩仔壯矢吞狂兇威驚臥老罷呼號
張義憤筦榷裕軍資喋血城終拔攻心績詎遲耕耘仍布野
江漢復爲池狡寇來頻挫凶徒憚莫窺招徠趨襁負忤舞起
瘡痍根本能膠固微猷遂設施庶寮除情竄百度肅綱維墨
吏章先劾循聲轂首推惠農寬賦斂募士汰驕羸徵辟宏開
幕詢謀直造帷驂騶鳴輒顧羔雁踵相追握髮延無倦虛懷
納不疑豪英咸吐膽策力盡揚眉裁決文饒匹經綸景略規
令行流水速教下疾風馳弱卒終成勁殘曷倏振衰三淪兵

燹域一變富強基
擗標歸廬墓哀號強進糜

丹綸恩最重墨經義奚辭
暴露親寒暑厮徒共渴飢
頻煩籌筆驛靡監出車詩
將帥潛調總機權密指麾
淮渦圖並舉廬霍待分披
疾擣濡須穴徐封建業尸
壘成遊釜泣計定折箠

答倉卒

巡遊轍郊畿板蕩時入援
途盡梗卷甲眾多疲不展
戡除力難謀翼戴期提袍
申躍馬仗節勗如貔楛倚
量沙智軍懷挾纘私忘身
甘况瘁嘔血竟支離夢寐
猶呼戰存亡但付醫養痾
旋夏首輿疾返江湄皖口
闔方拒渠魁勢不支梟巢
焚結烈鯨血滲淋漓九地
殲蛇豕諸軍勇豹螭黃州
塵亦淨白下

氣先禴捷繼飛書至功歸勝算持有瘳虛報竹勿藥爽靈著
人傑終淪喪勞臣不愁遺心依

天闕迴魂逐

鼎湖隨鬱鬱蛟龍劍悠悠熊虎旗山川羊傳淚衢巷國僑悲
浩氣凝河嶽寒芒躡尾箕干城長已矣笳角倍悽其定切
宮中悼疇專閩外司易名瞻

國典加秩仰

皇慈金石銘無媿馨香禮亦宜昔公挺湘浦開世稟殊姿甫
謝金門籍俄標玉帳奇豈無駿蹶蹶卽復雁門跡心只專開
濟途甯問險熾條侯當緩急裴令係安危鼉極三山負虹梁

一木搢撼波憑識鎮錯節觸鋒劍落落操剛直諛諛任詆欺
干將行擊斷太華峙屢屢法立初嚴陷恩流卒涕淚忠勤酬
異眷文武信良猷大蹇朋堪濟中興事可爲管商猶瑣瑣種
蠡亦卑卑翰溢公誠志歲餘壯烈詞數年如更假四國必長
綏賤子邱園伏名公國士知柳營榮嚮往葑采辱詎咨說劍
儕蒙叟論兵效牧之禮優逾結襪術短等囊錐野哭傷頽厦
天高痛隕棖夢雞符惡識弔鶴阻修遠此日房公榷他年蜀
相祠英雄襟上淚終古只紛垂

雷斧行

陳毅甫別駕得此於山中農家云雷公斧也持以見
贈形闊四寸高二寸厚五分錐銳不及分重斤許色

黝黃質非金非石叩之聲璆然有穿孔大如錢疑
若陷柄者然中一綫隆起柄不得施莫能測也

雷公破山挾雷斧，
殛魅裂狐不勝數。
倉皇丁甲宣勅歸，
遺斧空山蝕風雨。
山農取卽聲鏗然，
非金非石澤且堅。
陳侯購得乃貽我，
解贈佩刀同呂虔。
無柯如我歎誰假，
持斧繡衣非使者。
只合追隨谷口樵，
丁丁送響長林下。
縱橫狹狹獠磨齒，
牙誰能喚起阿香車。
從天霹靂忽大震，
齋粉梟獍摧長蛇。
天門伐鼓聲逢逢，
仍當持斧還豐隆。
有時取擊速無迹，
不爾閉置亦頑石。

宜都登無量殿後高閣

攬袂如上化人臺，
千尺高費四望開。
碧湧城隅雙練合，
青浮夷塞萬峰來。
諸天坐閱恆沙劫，
浮世同歸大道埃。
惟有法輪

長不壞琳宮鹿苑自雄哉

過朱槐卿茂才宅

青山不待約輻輳赴軒楹日日茅檐下白雲相向生芙蓉臨
水笑橘柚帶霜榮薄暮高吟倦閒看叱犢耕

移家先十稔背郭謝塵喧了不問時事何知有竄奔天教回
蔗境人羨住桃源韋布從吾好珪簪詎足論

出宜都西郭訪楊茂才心物

翠屏千萬疊飛影落中流門抱清江曲環爲明月洲畸人懷
遠想高步抗千秋坐久忘言象前汀下白鷗

贈張海峰茂才

開尊吾憶孔文舉投轄君爲陳孟公豪士未除湖海氣醉談
猶露滑稽雄高才伏櫪悲何限餘事臨池老益工眼底滔滔
無足問只須浮拍酒船中

答孫玉堂茂才

名璧文太平縣人

轉徙沙鷗宅艱難戎馬辰窮途仍坎壈英骨自嶙峋問爾榆
鄉士多予蘭臭人

同年焦錦江刺史令叔紀
堂君之同里皆吾友也

當筵投傑句拔

藻條如神

魯國孔文舉斯人安在哉何時騰薦表爲爾拔奇才風雨留
羈客江天共酒杯片帆東下速相望渺荆臺

晤小雲茂才

百姓堂全集

卷二十一

七

閉門耽習靜望古嗜搜奇自曳獨絲繭工吟三影詞江山成
俊會尊酒慰離思望爾九苞鷲終然耀羽儀

憇惕臣茂才宅留贈

文學淵源久家風孝友餘清平能愛客灑掃爲延予已動名
賢賞宮保胡中丞策士
曾以文學受知非終處士廬崢嶸望東觀待子曳華

裾

宜都山水清佳爲吾郡之冠信宿匆匆闕未游歷悵然有作

用述歉懷

峰聚西南秀排空碧玉屏江環雙練白雲壓半天青餐勝情
先往梯幽跡未經重來當蠟屐書此證山靈

却虎詩和楊性農駕部

偶然片語懾山君樵路從容掃白雲排難無慚天下士直憑
奮舌却秦軍

月上疏梅萬壑高尋詩來往興猶豪少陵伐木無須課不用
夔人屋壁牢

爪牙攫搏戢跳梁有道真能化暴強百萬橫行猶下拜黃巾
不犯鄭公鄉

樂府徒傳猛虎行山中麋鹿了無驚彎弓嗤爾熊渠子月黑
空飛霹靂聲

率野猶悲虎兕歌磨牙鑿齒日經過先生縱有爛翻舌尙恐

牛哀幻化多

安徽有雙樸作連理或繪爲圖海甯陳君駿于持以徵詠爲賦之

安州有樸挺連理參天勢若雙龍倚周家養士皆國楨何年
遺棄深山裏海甯陳君雅好奇攜圖示我邀題詩蒼虬夾擁
千重葢翠鳳交垂五丈旗凌霜戰雪老崖壁不遇般倅眞可
惜輦致豈獨無萬牛良材翻遺閔幽僻我聞銅馬燔安州百
里草木皆虔劉樸乎汝幸脫烽火又恐或罹斤斧憂物理升
沈多不同得時便作朝陽桐元愷夷齊並同氣或借弼亮或
終窮樸兮連蜷踣澗壑榮悴安知造化工還君此圖淚泣然

不如社櫟終天年

同治行 有 詔以明年爲同治元年誅宗室亂政者三人

虹霓干天白日翳羣飛訓狐相嫵媚髯墮神龍歸

鼎湖姦黨睚眦潛得計制書變亂行四方自謂元愷今忠良
束藁爲椽葦作柱幾傾宗社頹紀綱臺端有鳳朝陽鳴抗疏
凜凜風霜生若輩滔天尙如故清議安能爲重輕女中堯舜
今復覩

夙駕還宮衛

沖主改元同治

中興期

詔下雷霆赫斯怒罪狀盡暴姦羣斧礮濺血身首分此曹
覆轍豈知鑿前有曹爽後伍文盜權竊柄誰能久不作共和
作凶醜崇山幽都乃敢偶黃鉞一下伏厥咎

澹哲重華頌我

后

雪止登齋中樓

今年飛雪勢何驟一夜瑤花積階厚披衣曉上齋中樓不辨
亭臺與林藪參差粉蝶排高城城中萬戶寂無聲陂塘澹澹
鷺鷥散枯葭斷葦猶縱橫風威餘力撼空大竟欲拔樓出天
外目窮銀海浩無邊時有白雲如曳帶循闌疾下不敢留欲

訪疏梅何處求
叩門剝啄亦少客
貫酒將換五花裘
庭前雜卉盡
僵踏老桂森森何挺特
崔嵬戴雪三丈高
伴我蒼寒不改色

曉登樓上眺晴雪

積雪猶封徑
朝陽已射林
闌紅標堞峻
潭碧斂波深
塵壒消何處
光明證此心
高吟人不覺
未怯峭寒侵

次日復雪

昨霽今仍雪
河山積素同
寒光飛動外
灝氣混茫中
凍戢林間鵲
歸迷天際鴻
誰擒山邑寇
能作李涼公

施州屬邑爲黔賦襲附

雲臺秋社圖爲熊春驅大令題

招攜羣從傲巖扃九日峰頭倒玉瓶
傲吏歸餘雙鬢白好山秋爲一家青
豺貙未遣櫬槍掃猿鶴猶邀蠟屐停
觴詠清遊今視昔風流何獨重蘭亭

歸舟發渚宮箴三淵甫星堂耀卿仲嘉
西垣送至河橋而別日醉沙頭碧玉鬢
片帆東去返柴荆干林氣透春前暖七
澤天回雪後晴臘鼓關心遊子夢河梁
攜手故人情離亭歲歲仍相似更對煙
波別俊英

吾生

吾生謝智巧何亦任勞憂有賦題窮鳥
無歌託飯牛時危空感激年往復羈遊
取魏長沮輩營營安所求

漁舟大集於白鷺湖見而歎之

白鷺湖中水波震遙見漁舟如布陣邀遮分合爭相先張網
投叉雜然進鱸鮓鯉鯉無所逃亦有細小盈輕舸連船分載
入市肆高門大第供礮刀十年寓縣多豺貙堅砦雄城頻見
屠磨牙剝刃恣吞噬不異竭澤充庖廚况聞虐吏效數罟析
及秋毫困商賈搜索往往罄豪右察見淵魚翻自詡嗚呼上
天降殺戮禍機何更中鱗族蛟龍徙宅皆遠遊眞宰將無回
慘酷腐儒粗糲良所安對此停筓不能餐時危甲兵且未息
忍使物命多傷殘

乘夜放舟

中夜輕帆發舟師未告予不曾聞擊汰誰道轉村墟雞犬聲
猶接覺驚夢自如我心同不繫凝滯亦銷除

水次感賦

垂老猶奔走羞窺此水濱嶽崎應笑我少壯不還人只益觀
河難言利濟身茫茫衛洗馬百感自沾巾

魏闕

魏闕頻縈夢江湖獨子牟人嗟豺虎鬪國想鳳麟遊一旅能
興夏諸侯能戴周餘生逢

景運未敢厭林邱

獻策圖爲星堂題

我有盤龍簇鳳之冰綃上織驚天透雨之奇字恆欲通之閩
閩門天路迢迢莫能致回風飄雲不我將日久濛濛化爲淚
年歲晚今日西馳篋中棄置心自悲便當藏之岷巖之上沈
之清冷之池千齡萬代不遣人閒知君今挾策將何干得不
念彼路漫漫路漫漫兮知已難何由抗手青雲端君言
景運翊冲聖

兩宮垂簾察

朝政懿親夾輔如元公殛罪登賢天下慶近者

詔書下求言徧臣工芻蕘盡奏進羣情靡不通丈夫讀書慕
奇節致主思爲臯與說萬言落筆蟠蛟龍誰忍衡茅甘結

黃金榜射彤雲開郡國貢士皆英才要令敷奏見董賈曲學
縱橫安用哉期君直上長安道年少尤須致身早鸞皇鶴雛
當在

朝我自林巒任枯槁

元日喜晴

同治壬戌

元年元日光華啟中葉

中興瑞應歸齊慶千齡新鳳歷遙瞻萬國拜

龍旂周成復繼卷阿盛殷武能張景毫威海宇自今銷戰伐
潛郎甘老釣魚磯

對雪甚寒

飛雪踰三尺窮邊無此寒穴封狐兔匿威殄虎狼殘石澗尋
源沒冰條破蘂難柴門驚彙列未敢臥袁安

鴻濛子歌贈寶甯方友石

友石署其集曰鴻濛

鴻濛子狂歌自署鴻濛詩脫銜天馬不可羈論兵疾草廿四
策韜畧能兼龍豹奇鴻濛子汝家乃在蒼洱萬餘里浩然下
泝蜀江水楚皖百戰場滔天盡蛇豕出入鋒刃間躍馬輕九
死不矜俠烈名非博珪組榮誓爲

國家剪凶桀歷千大帥皆無成長揖浮湘入廣州海波接天
不洗胸中憂鄉關阻亂歸不得卻挂孤篷江上遊七年名姓
知君久歲暮荒江初握手朔風卷雪橫空來莽莽千里如龍

堆君停沙上權我蟄空山隈徑路俱斷絕不得同銜杯吟君
詩誦君策揮霍天人才眼中見此客鴻濛子汝乘元氣遊鴻
濛負鼎飯牛汝豈不能希其風高言王霸竟落魄賈豎笑汝
非英雄汝今往謁

閩闔門側聞有

詔方求言丈夫立談取公輔壯若風生嘯雕虎鴻濛子半刺
徒勞恩乃公何不上書動人主

同年張仲遠觀察以所識朝鮮使者李君瀉舡尙迪恩誦堂
詩集見貽因索拙詩轉貽李君意欲爲結海外牙曠也輒
賦二詩寄贈李君並呈觀察

帶方熊岳挺詞英人指乘蓮太乙精上介簡書榮道路中朝
縞紵徧公卿海天縹緲傳仙操華夏風流得正聲季札由余
並賢達看君千載嗣高名

平子琴尊海客圖題襟高會鳳城隅金蘭臭味遙堪接仙李

風流迥自殊

仲遠觀察海客琴尊圖卽爲李君作曩曾附題句於卷末

舊雨關情傳雁帛

新編照眼鬪驪珠狂吟亦有千金帚能動雞林國相無

熊秋白農部去秋舟過敝里賦詩見寄作此答之

故人貽我書題詩賦別紙秋風揚片席日暮泊吾里褰衣陟
石岡林壑眷清美俯仰悲昔年豺狼餘廢壘君家洞庭濱日
望洞庭水扶輿歸瀕洞日月無終始溟渤可並包蓬壺若尺

思隱見蛟龍官噴空大波起天設滌瀆區氣象廓雄偉浩浩
如君才騁懷當屬此何爲顧崕嶮長吟色然喜乃知達人心
廣狹可齊視所媿羈郢門未能迎倒屣君今還

帝京行傍五雲裏

廊廟需夔龍謨明贊上理泉石付吾儕垂竿老中泚

袖石方伯見題拙什且招遊大梁賦詩答謝方伯時以被議
解職

亢直追朱穆風裁峻李膺如何操白璧猶道玷青蠅才雋譏
偏集名高謗易乘君看阿閣鳳亦避得霜鷹

苞苴門下絕權要洛中多世自工彈射吾能任嘯歌天高終

聽察風逆偶蹉跎得失鴻毛事無勞醉慰詞

意氣惟敦舊風流自愛才爲懸高士榻相待孝王臺遠道猶
多梗清遊阻未陪梁園詞賦地空讓古鄒枚

里曲非元草勞君歎絕倫豈期焦尾質竟遇賞音人出處途
雖異文章契有神汝南評許借吾道氣先伸

日月開三極星雲麗九霄受書方置匱前席且歸朝退覬旋
當起搏鵬故自遙潛夫搔短髮只合伴漁樵

解嘲

浪傳薦牘及林居猿鶴山中笑有餘縱使羣公猶記憶豈堪
華髮就微車

元夕偶憶

昔遊秦隴上元春
燈火如山月似銀
繡幃香輪圍十里
紅妝擁看踏歌人
昇平樂事今難見
四海何年罷征戰
江村寂寂度元宵
獨對寒檠淚如霰

春寒

玉戲番番劇乘春
鬪化工未能欺竹柏
但足掩蒿蓬凍浦拳
汀鷺歸途滯塞鴻
將軍如力戰淮蔡
可論功
抱潔何爲變憑高
若自擠橫空猶玉屑
委地已春泥迹可光
塵混功還露露齊
滋榮人不覺起看
麥苗畦
仲春朔日又雪

頗苦寒猶返仍驚雪又加風威驕朔氣物色滯春華磴路梅
難圻汀洲草未芽少陽方用事無乃候多差

贈余楷堂

楷堂江都人以避亂客吾里

二十四橋無覓處一千餘里未歸人暮年回首昇平夢故里
傷心戰伐塵鐵甲照殘邗上月瓊花吹斷廣陵春東還莫作
蕪城賦萬代千齡最愴神

早聞遊俠動長安戎幕栖遲興已闌盡道通才羅武庫誰能
傲骨換麤官閒同野客諧鷗鷺晚有奇兒敵鳳鸞岸柳汀花
相慰藉不妨行李滯江干

答舍弟子章歲暮見憶二首

阿連彈鋏歲將闌念我飢驅意少歡千里書傳梅驛滯一枝
春隔棗華寒西瞻飛雪連天白東望傳烽入夜丹旅客裁詩
欲相寄正逢鳴雁過江干

搜揚才俊贊維新嘉會翔遊總鳳麟自顧只期全櫟社不才
安敢望蒲輪慙登北海推賢表恐笑南山捷徑人伏

關上書吾有願終當初服返垂綸

舟次贈鄧西垣貳尹

年少翩翩意氣豪扁舟來往狎風濤頻吟雋句如鸞嘯不愧
名家有鳳毛遠道連屯銷赤燧芳春麗色滿青皋

中興邗運需才傑盍起摩挲百鍊刀

雨泊

夾岸飛朝雨，低空墮野雲。
煙籠春暈畫，風約水回文。
欵枕聞鳩喚，維舟起鷺羣。
渾忘桃李節，客緒獨紛紛。

晚霽

與客共推篷，晴雲漾太空。
天圍平壤綠，日浴晚波紅。
芳序遲江國，清遊憶渚宮。
聯吟有仙侶，猶喜一尊同。

風利渡白鷺湖

飛渡俯茫然，中流起扣舷。
橫翔雲葉疾，穩抱日輪懸。
壯闊魚龍宅，蕭閒鷗鷺緣。
此身疑漢使，槎泛斗牛邊。

柳枝詞

柔條便欲縮芳時
縷出纏絲縷復絲
作盡風前無限態
春光曾否解憐伊

最好韶華去不停
春痕無計挽離亭
古今盡逐東流水
惟有垂楊歲歲青

沙津舟次答于蕃觀察見贈之作

戈船西泝峽雲間
草檄威騰六詔山
鏡吹特翻朱鷺曲
弓刀重度碧雞關
扣囊餘智收三捷
借箸前籌定百蠻
舊日繡衣稱使者
邊人爭識鬢初斑

疇昔風簷比舍連
對牀重臥楚江船
青雲並送雙飛翼
白袷回思兩少年
老大翻驚聞戰鼓
淹留相顧惜離筵
愁心直欲

隨明月挂在昆明萬里天

維新休命肇

皇輿薦表搜揚處士廬

聖代豈無箕穎節

清時可少治安書
馳驅自覺年華晚
匡濟其如學術疏
慙負故人期許意
難陪枚叟赴安車

瞑坐對雪

積雪照階庭
蕭齋戶不扃
古今歸太素
宵晝一虛冥
凍鳥窺將下
征鴻去未停
忍寒尋曲徑
蕉竹失餘青

庭下叢桂積雪封條戲詠一首

百柱堂全集

卷二十一

美

凌兢戴雪戰嚴風掩卻蒼蒼桂樹叢忽向闌前驚玉樹無人

移植上林中

喜古生俊卿傑來自豫州

衝泥單騎正炎風朔雪揚帆向渚宮勁翮低垂雕鳴後畏途
馳出虎狼中宮齋喜謁親闈健戰鼓愁聞郡國同三徑足音
相視笑殘年猶得慰飄蓬

閒嘗反覆正月桑柔諸詩而後知其時之賢人君子感憤怨
誹蓋有由而然也不觀之醫者乎見有疾者之呻吟焉宛轉
焉倘得千金之方與起死之術無不亟舉而投之使得免於
死也如其入憤憤然不以爲良焉而仍雜投夫一切不可嘗
試之技則不免深曠太息咨嗟於其旁又或大其聲急呼不
惜爲危苦之詞以迫告於其所親暱使之共相救以免於死
亡而後已此正月桑柔諸詩之旨也嗚呼推斯義也可以讀
子壽秋曹漆室吟矣武陵楊彝珍跋

百柱堂全集卷二十一終

百柱堂全集卷二十二

壬戌癸亥

監利王柏心子壽著

當塗唐子瑜孝廉過訪荷見題拙集賦此奉酬

壬戌

秦地牽絲客胡爲此滯留江中誰擊楫天畔且登樓滄海王
尼歎關山庾信愁飄零將入口未有稻梁謀

自失天門險東南白骨場吹唇驕獫狁擇肉飽豺狼兩越山
川秀三吳財賦疆因君陳喪亂眞宰意蒼茫

訪古來荆郢荃蕪未替芬風流招屈宋僑寓得機雲

兼謂令弟子度

並是江東秀相將物外羣蕭齋久虛寂何幸足音聞

十載憂時作霑纓不可聽無能藩魏國亦未哭秦庭敬賞先

題句雄篇碎發劖鉛刀勞拂拭一旦比青萍

甫後庭院芝筍並茁各繫以詩

積雨蓬蒿徑森然赤箭熒無心應圖牒得意吐英靈焯煜光
何燦機緘化未停商山猶可采勿遽謝巖扃

龍鍾吾已愧犀角汝偏奇英槩彈冠會高才釋褐時迸穿羊
仲逕漸近董生帷預想炎歊至涼雲映最宜

答贈周筱樓學博

縹緲仙人黃鶴樓東連赤壁俯滄洲高歌昔鬪吟情健濁浪
今餘戰血流風景揮殘名士淚煙塵吹盡少年遊客星重向
荆臺聚亂後相看兩白頭

躍馬親援丈二身黃衫褶袴效前驅爭傳草檄歸才子直取
長纓縛賊奴力戰功名仍坎壈還山心膽尙雄麤聽君醉話
沙場事孱懦眞羞作老儒

登樓相對感多同世運何年息戰攻不見將軍屯瀚上俄驚
烽火徹秦中河魁玉帳徒相望天險金城故自雄西上援師
宜疾關先馳露布慰

深宮

題吳氏鬼女鳴冤記

鶴峯女子吳菊英嫁爲州人于氏妻其

母詣刺史訴之質獄數四啟棺諱視傷固在也遂蔽罪小

姑刺史自記其事持示徵題刺史者梁君元珠華陽人也

哀哀鬼女黃泉閉魂魄非強亦爲厲不藉冥報藉刑律人間

恃有神明吏得靈睛飛刺史堂血面森然立在傍塚尸未腐
駭不爽小姑氣奪無講張萬人觀者羣歡呼鬼獄能斷今豈
誣強死償冤事非少神明刺史世則無惜哉刺史滯一官不
著杜後惠文冠若遣乘馳理冤抑鋤強扶弱人皆安天下牧
令凡有幾恐有沈冤或類此安得州皆梁刺史回光盡照覆
盆底

送耀卿柳村赴秋試

我攜二子章華來帆勢東逐江流開江流浩浩劃天地何似
二子澎湃胸中才楚邦亂後搜英彥箇箇鞭柎亦頻見少年
二子尤絕倫懷裏蟻珠光若電過我山中對風雨雄心壯激

秋濤怒絕迹誰爭二駿先摩空共快雙鴻舉明日煙銷放棹
行翩翩終賈奮英聲國門價定荆山玉聯璧同高十五城

展其大令雲縠駕部並自豫章歸應鄉舉咏此代訊

國士兩吳君歸來張楚軍袖攜五老月帆挂九江雲跋浪蒼
螭步垂天赤鳳文喜傳消息近書此慰離羣

南山淪茗圖爲利叔題

茶烟碧裊松陰翠啜茗當年留韻事豈知湖上南高峰倏變
煙塵餘涕淚嘗膽徒聞志士悲跑空猛虎亦不歸山川腥血
何時洗誰激奔泉百道飛

哀江甯汪氏兩女子

兩女子者江甯汪梅村孝廉之女也賊陷金陵兩女先後以節孝殉長者曰淑

遊文者曰淑蘋長
者蓮吳次未字

建業妖星下枉矢春風無地葬羅綺江東露髓積如邱中有
英英兩女子女也系出金陵汪恨無白刃誅豺狼長者辭姑
赴水死少者殉母偕弟殤萬卷無慚讀父書劫灰終不掩璠
璣時危大節出巾幗文武諸公恐不如人間椿樹飄零苦地
下荃蘭化爲土縱使芳根化不歸完名猶勝中郎女

釣宅

時秋漲大作

秋水浮天滾白沙茫茫釣宅是吾家潛郎總被汀鷗笑不泛
等源使者棹

中秋積潦造閭

滄洲浮釣宅秋水浸柴關
萬里蕩明月茫然瀛海間
方乘汗漫興何謝蓬萊山
徑欲邀龍伯連鰲共往還

答香谷姪

頃以應

詔上書

優詔賜褒故渠詩有勸駕之

良時非乏士愚者自輸忠
身遠瞻

三殿天高

達四聰

絲綸叨

帝獎山海仰

宸衷私喜羣賢路雲堦可漸鴻

同治初元應

詔獻經論及封事渥蒙

褒答恭紀

葵藿只知傾白日芻蕘何幸徹

丹宸

宮廷懸鐸開言路山海彈冠起俊民朦誦進儲

宏德殿

詔以所進經論入首存
宏德殿備乙覽

溫綸首被太和春潛郎華髮

逢

嘉會無補謀謨愧此身

冲年軒帝徇齊質多難周家訪落時踐阼初承

神聖業納言先定治安基陰陽災沴當潛弭反側姦雄可坐

筮

景命用由

皇敬德墓圖新數

中興期

題孫夫人像

阿兄低首漢家仇，婚媾終難借一州。
千載蠅磯魂上下，傷心敵國起同舟。

答耀卿歸舟見憶

放櫂歸趨省看山，興亦慵長風送鷓鴣。
秋水壯魚龍虹氣，方呈采鶴膏。早淬鋒傳詩勞折簡飛，
度碧雲峰。微忱懷藎悵萬里，獻芻言敢料憂危。
意真通。

閩闔門包容優

百柱堂全集

卷二十二

五

賜獎疏賤首承

恩林潤增

榮寵何須慕鶴軒

憶講舍庭下桂

叢桂荆臺冠旃檀一氣分留花應待我招隱合從君天末橫
秋水山中隔暮雲廿年成老友不異悵離羣

前後見此桂廿餘年矣

于蕃觀察寄示代草諭演檄率題其後

行營師未發幕府檄先傳霆震羣迷夜氛消六詔天鑄標遵
舊約賣劍事春田一紙平蠻解功居血戰先

答黃默初

舍南舍北水雲環子向蘆中獨叩關不畏風濤揚短椀相從
燈火話秋山浮生放意饑寒外中歲覃思著述間證史談詩
殊未倦吾衰亦覺頓開顏

初元

踐阼仰

唐堯韜鐸

求言自

九霄

優詔遂加疏賤士

達聰真遇

聖明朝羣賢譙論途方闢入表清光翳盡消芹曝區區同野
老只將身事付漁樵

灌木

招提藏灌木秋碧更迷離曦月暉難入榮彫候不知蒼藤紛
嬋娟丹實晚纒纒長養逃斤斧將無造化私

寄答則山水部

風逆蓬山引輒回南歸親翦故山萊憂時暗下江湖淚讀史
先衡將相才烽火十年驚九徙雲霄終夜望三台悲歌千里
貽同調懷抱因君覺頓開

求言

詔下仰

宸襟野老聞風效獻箴敢恃精誠通日月何期

褒答逮山林狂夫猶擇時無諱

泰運方開慶自深行望吾賢先赴

闕薜蘿休更戀幽岑

雨泊

朝雨湖光暗停舟此避風餘聲憂林滴驟爽豁秋空漁舍蒲
荷外炊烟葭菼中客心渾澹蕩夢與白鷗同

晴暉

碧水漾晴暉輕鷗野渡飛林陰秋轉密田露午方晞晚熟紅

蓮稻臨流白板扉此鄉際豐樂寇潦幸均稀

弔蔡竹農學博

以郎西廣文殉寇難

平生擇地蹈繩尺未曾踰守道翻成勇臨危不顧軀耿光留
俎豆大節凜師儒侍者甘從死堂堂義烈俱侍姬亦偕君殉

昔歲馳驅役同車謁

帝京古心歧世俗孤尙喻廉貞只自嗟離索誰知隔死生粉
榆藉吾子千載重英聲

江陵水村

岸折波彌曲天開壤更平村隨楓隙露帆出柳梢行
家飲醵幽樂葺聲有年先澤國父老慶秋成

霜信未至岸楓射波絢若赤霞鮮妍可玩

秋林忽吐赤琅玕出色緋桃訝並看不待新霜先絢爛江湖
原有寸心丹

西征

五兩西征始嚮晨起看秋水浩無津陽烏浴景浮金采潛鯉
窺波閃赤鱗意氣澄清懷擊楫江湖奔走愧垂綸田園蕪落
年華晚空有文章動

紫宸

舟經龍口 右長湖南岸

烟波環鄂北覽古有餘哀偏霸權家啟重關水國開蔓荒高

氏墓秋敞闔廡臺泛泛鷗鳧宅興亡安在哉

九日星堂茂才邀同諸君至紫雲臺登高晚過其宅是日其
尊甫春園博士留飲

羽人樓閣瞰晴空百里浮烟豁渚宮黃葉遠明秋澗外丹梯
迴拔市聲中歸途夕照歌相答令節清遊興未窮深喜鄭莊
能好客簪萸還與故鄉同

招邀茲會盡詞英博士才華老更成南國最工騷辨體西風
初息鼓聲聲衰年誇健忘羈旅勝日追懽藉友生但有黃花
兼紫蟹不知何物是浮名

西垣貳尹張飲菊花下賦詩見示因和之

高秋風物清令節近九日粲粲東籬花光艷忽如溢主人攬
眾芳羅列照堂堂爛然金紫叢貞秀挺天逸高蹈夷惠間塵
表獨超出風霜不能侵凜然英傑匹華燭照清尊瑰詞振雄
筆良會不可常軍檄流星疾誰持白羽揮一使風塵諡吾儕
安嘯歌幽尙葆貞吉共餐禿客英憂端頓如失

題空捨居士照

周君宅三新易佛名曰空捨

西方俗悍戾好殺起貪瞋厥有釋迦氏導彼虎狼仁寶具大
雄力能空業與因萬緣只一拾四大皆微塵可以化爭斂平
等無冤親邇來殺機作大運嗟尼屯貪瞋迭相報翻覆如轉
輪刀兵釀巨劫流血哀生民我見空捨子忽現瞿曇身俗情

百林堂全集卷二十一
九
所健羨棄之若埃薪靈臺日浩浩蒸作人間春大地息戰鬪
萬世無黃巾此爲極樂國廣大良無垠慈筏倘可耐爲我渡
迷津

至日雪

漠漠同雲送歲華驚心緹室瑄飛葭

宮中瑞莢方舒葉天上祥囊盡作花徑絕深曦啼虎豹寒封
巨壑蟄龍蛇遙憐戰士征衣薄愁聽嚴風萬帳笳

長湖泛舟

昨與英流別湖天勢頓開沙籠寒瀨淺岡走斷雲來闔世徒
成役還山不用才歲闌春信早應發故園梅

湖中卽目

冉冉輕帆發戎戎宿霧深
遠岡時斷續寒日半晴陰
蓄洩良圖渺英雄霸蹟沈
泛波何浩蕩沙鳥自無心

寒涼冬來淺登艫尙渺然
帆遲如未動鳥度更無邊
迢遞家山夢光陰客子船
日歸慰來諗猶勝使車旋

奉懷大京兆蔣申甫師

初元

延訪下

絲綸先後昌言獻

紫宸海內並傳師弟疏
天涯相望潤阿人

雲間耿耿

丹霄夢子舍依依白髮親惟祝

欽明符廣運林泉長得荷

堯仁

舟經三湖得西風

湖神真踐諾歸旌贈西風遠舉凌黃鵠飛行躡彩虹雨來籠
鏡濕煙薄颺綃空無數鷗鳥起驚回曉夢中

四塞

河山雄四塞昔號虎狼都蹄踵居何雜椎埋習獨殊厝薪安
寢處伏莽起須臾先識惟江統誰人獻遠謨

鷲悍花門性傳烽勢忽驕見愁三輔困復恐五涼搖氏種凶
頑煽羗酋氣類招關西古天府今日遂蕭條

頡符頻遣將誰解定關中專制思馮異長驅億馬隆宣威安
反側樹惠靖兵戎處置覘方略非徒汗馬功

六鎮皆稱亂三方各阻兵築壇求將帥推轂仗豪英世變叢
憂患天心啟

聖明

堪家承執競懲毖望

周成

舟次漫興

長飈與流水日夜送歸人但許詩爭捷篇成亦有神

東還

東還獨送東流水北鄉將歸北地鴻晏歲冰霜仍不減衰年
意氣爲誰雄詩篇自放江湖外奏草猶陳

殿陛中但使九州無燧火未妨三徑有蒿蓬

平生

平生黽賈術猶疏恥效文園獻子虛獨和山林招隱什空塵
師友薦賢書千齡圖籙歸

競業

九伐威靈奮掃除

光烈覲揚逢此日潛郎未敢薄樵漁

歸舟風利喜述

逆歸江介東南權拜賜湖神西北風料是草堂扇不佳歡聲
後鶴滿山中

寄九曾農部

傷今思往烈忤俗得奇窮兄弟自師友文章皆孝忠飢來通
謁少醉後縱談雄落落求威鳳長鳴在碧空

舟夜風雨不寐

扁舟夜聽撼林風勢擁奔騰鐵騎雄濁酒悲歌燈暈後勞人
心事雨聲中屠龍安用傾家技上馬難求殺賊功頭白至今

成底事天涯飄轉一飛蓬

野泊

漠漠寒雲重孤舟滯未前
歸心爭日夜雪意飽湖天
爭樹羣鳥噪翹汀一鷺拳
望中荒寂甚排悶強裁篇

暝色

竟日荒村泊遙天暝色沈
濕雲垂黯黯寒木立蕭慘
輿託阮生嘯愁成莊鳥吟
客心比流水千頃未爲深

舟中誦孝長短句弔之

薄倖青樓不負春風流埋沒頓成塵
縱橫一代樊川筆誰向千秋惜此人

夜大風

決漕元雲鬱不開荒汀入夜朔聲哀波翻動地干虬走風捲
跑空萬馬來寒重宜傾京口酒句雄猶避古人才忽思玉帳
宵傳令凍裂旌旗斫陣回

舟雪

羣玉開天府長空散瑞霏非春能關豔於氣但資清漁艇增
應重溪橋積漸平今年三白足定卜土膏榮

竟日推蓬玩彌天作絮飛因風矜舞態綠隙透寒輝可任霑
書帙猶防溼客衣扁舟寒轉甚酒力尚嫌微

讀申甫師奏進同治 中興策

文字宣公學考亭鴻儒吐論炳丹青

膺圖首進千秋鑿納牖深憑

九廟靈

褒答詔書榮澗壑綢繆忠款結

朝廷首臣孝子身兼美慈竹長欣託瑞冀

舟次大雪

朔風吹雪滿汀洲堙谷封條遂不休
天運潛隨鴻洞轉波聲遙入混茫流
閉門高士誰相問縱獵平原未可求
諸子章臺應對酒知予行李滯扁舟

雪中獨飲

雪花茫茫送流水來自龍荒幾萬里穿窗撲袂如有情片片
飛入酒尊裏雪花入酒能生香激灑泛作流霞光人生清景
不可負勸君須盡黃金觴興酣忽遇浮邱仙駕鶴驂鸞遊九
天邀我崑邱上懸圃琪花開落三千年歸來玉壺仍在手醉
後牢愁亦何有侯封相印皆等閒肯換雪中一杯酒

大雪乘風渡洪湖

浩蕩一帆何迅疾鴻濛六合尙胚胎重溟波策蒼蘆渡長嘯
身騎白鳳來垂老豪遊增逸興驚人奇語屬仙才須臾已見
家山路深雪柴門掃未開

湖上雪村

湖村多隱雪濛濛浦漵全封路不通望裏人家殊雋絕洞天
世界玉壺中

寄湘南時客當陽未返

三秋抱荆璞中夜攬吳鈞涕淚無端下沮漳不斷流飢來甘
負米歲盡待回舟予亦厭行役王孫豈好遊

寄楊薊墀刺史沙津

家承節鉞晚彈冠荆渚停舟歲又闌赤燧山川愁望裏白頭
風雪滯江干三刀入夢功名易六詔飛蜀道路難愛子還鄉
應早達關心故里最凋殘

君泛舟來楚以幣鈴濟滇館云

次韻答寄耀卿

別意津亭黯朔風長天飛雪送征蓬柴門賓客方交問蘭訊
煙波已再通日月堂堂槩澗下河山莽莽戰塵中詩來感激
吾衰甚馬稍橫盤氣始雄

申甫師奉 詔歸養維舟枉顧敬呈五言一章

鵬翼廣千里南赴天池遙回翔暫息運終起摩絳霄我師蔚
時棟峻若鳳在條絳騶領京尹三輔靜不躑

顯皇值多事跋浪長鯨驕表餌策不效鱗介爭乘潮揚鬣敢
歎沫勢鼓三山漂虹霓蔽白日含沙助爲妖

乘輿狩關塞遠賡黃竹謠鮫蜃入都市官守盡奔逃大臣請
西幸秦中王氣饒師獨主三晉肇都古唐堯黃河右縈帶太

行左峇嶢顧盼接幽薊足壯膂與腰民俗況勤儉節義兼勇
剽朝漢百萬騎控引尤雄驍此實萬年計根本不可搖拜疏
伏

闕下沉沈天路迢策馬踰上黨義旅同盟邀迎

鴛計不就

鼎湖悲旣遼孤臣滯澤潞奉母并州僑今

皇始旋蹕復返

六龍鑣

兩宮翼

冲聖宗袞扶斗杓

訪落在懲茲莽繡憂未消師復竭羃羃馳奏陳芻蕘上者自
宮府下以肅百寮賞罰及征討疲瘵寬租徭魁柄盡還上徐
之元氣調

九廟聖神繼入絃氛祲銷

中興策十二撥亂在崇朝直接古伊傅何言管與蕭

溫綸果嘉納歸

闕促登輶陳情再三上有母鶴髮飄

陛下重孝治

聖慈蒙幸微許返舊田里歸侍晝與宵垂涕謝

優詔豈日懷場苗丹悰結葵藿依依在

本朝安車始發晉首路楓未凋易舟更過楚天寒雨雪濼小子遠侍坐復親鸞鳳標深談淚交下世變如衝鷲時艱且未濟莫釋中心悵所悵歲云暮不得停蘭橈拜送久竚立瞻望雲天寥

國家起

神武靈貺承於昭

皇德懋惇敏文景不足超渴賢日側席俊乂羅旁招吾師舊良弼誰謂安耕樵天書卽繼下望副蒼生翹來儀返阿閣振羽諧簫韶

寄贈柳村

生同王鎮惡

以五月五日生

咄此少年奇倜儻應相似文章復過之

讀書懷將略孤憤鬱時危力學儲文武風雲會有期

上左撫部

癸亥

節越登壇高將略

朝廷破格用奇才莫令羣盜縱橫久還望

中興氣象開兵甲早知羅武庫功名終待冠雲臺諸公戮力

神州復野老狂歌濁酒杯

汪子用大令屬題其世父小米先生東軒吟社圖

汪子示我吟社圖君家世父聯文儒東軒會比西園集主客

圖中如可呼詞客翩翩萃吳越主人逸氣更騰發境幽不異

竹溪遊吟就何煩金谷罰壇坫當年冠武林誰知回首跡銷
沈豈惟銷沈在回首劫運紅羊慘至今君家圖書三萬卷併
與園林滅如電此圖何幸出殘灰嘉道名流猶識面嗚呼寇
裂東南防重驅戰馬飲錢塘誰憐鳳舞龍飛地變作縱橫蛇
虎場少伯不生文種死嘗膽何人能雪恥氛埋南北兩高峰
血濺西冷一湖水君不見錢王國破宋都淪萬事滄桑最愴
神玉津梓澤亦已矣文物銷歸戰伐塵盛衰俯仰變波下勸
君且拭淚盈把家風猶有誦芬人但望行歌洗兵馬

癸亥早春散帙得袖石方伯手蹟蓋垂沒前月餘招遊大梁
書及詩也讀之不勝悽然方伯卒已兩踰歲矣爲賦二律

追悼之

搏擊蒼鷹侮鳳鸞成林枳棘礙芳蘭
謗書交上將盈篋
嚴譴初聞已闕棺白壁埋幽光皎皎
黃墟齋恨夜漫漫傷心
孟博慈親在慟撫輜車淚不乾

落職猶題尺素來嘉招未赴孝王臺
梁園頓惜風流盡汴水
如聞日夜哀交誼雲龍空上下
葬期車馬竟遲回
遺篇重檢
高常侍嗟爾飛騰一代才

參軍行寄贈龔剛士

參軍矯矯名家子一官沈滯百寮底
強持手版府中趨岸幘
歸來對文史下筆千言如湧泉
飄鸞伯鳳更誰憐人驚疎放

謝無奕自比清狂孟萬年朝見輸財拜方面暮見貲郎起乘
傳參軍亦是人中豪潦倒風塵作曹椽典衣沽酒日留賓假
貸年年不救貧擲掄窮鬼道旁立自古高才困積薪君不見
鼓鼙動地河山裂枉矢森森芒不滅

天子闕門延俊英將軍開府揖奇傑國士遭時易建功參軍
莫歎處囊中勲名將相等閒事肯讓唐家郭代公

哭伯韓觀察

同治元年春杭州再陷君死之

吾友朱公叔崎嶇逼寇氛晚途尤蹟甚大節以忠聞猿鶴哀
君子貔貅闕勁軍空拳甘冒刃慷慨最憐君

霜臺高直諫嶺嶠起詞英縱作挂冠去猶留折檻聲范滂雖

攬轡傳變不求生已矣經綸志空餘烈士名

聞依車騎幕轉徙更蘇臺九死身疑在孤雲迹浪猜誰知繡
衣容竟化碧燐哀遺懣犀軍弩潮頭射不回

英賢嗟落落世難益淪亡奇傑多兵死朋遊半

國殤斯人尤俊偉不遇遂摧傷一疏規言利猶懸史冊光

君在

宣宗時疏陳義利之辨
反覆數千言天下傳之

家寄豺牙險魂歸馬革遲舍生無復懣湛族絕堪悲榮杲連
兵日孫盧樂禍時登臺繫如意朱鳥暮何之

傾蓋思燕市停驂憶清宮聞鷄憂獨切躍馬氣何雄玉碎炎
岡上輪摧逆阪中尚遲

褒卹詔誰爲表臣忠

前詩意猶未盡復有是篇

繼麟服衡輓斂鳳困塵埃志士終全節明時竟棄才斧柯曾
未假劍鋸遽先摧風雨孤山夜將無化鶴來

輕舟曉過赤壁

輕浪東流故自閒烏林赤壁曉雲間春風不管英雄事吹綠
年年江上山

放櫂

早春沂江下放櫂中流行青陽布淑氣好風柔且輕英湖盡
發色蘅蘼亦菁菁羣峰啓朝鏡翠黛紛相迎遠綠會新漲浮

動空中明渺渺極千里遙情無故生忽然憶開闢龍蛇幾戰
爭廢興盡波蕩况乃浮世名客遊笑汗漫虛舟隨所征稷下
既卷舌亦不希振纓浩歌滌古恨猶恐沙鷗驚

春江

春江新漲綠浮影遠連天不覺心怱悵無端意渺緜奔沙沉
戰壘逝水送華年洗馬多愁者臨流易泣然

弱柳

綠痕搓甫就弱柳最嬌饒舞態因誰寵愁心爲爾搖清波差
足喚秀語故難描搔首眞慙汝誰憐青鬢凋

春愁

春愁無盡逐江流春水無愁也自愁誰惜春江花月夜銷沈
龍虎帝王州

舟過金口追弔播州唐公

公沈江殉節於此

孤臣拊劍淚潺湲權落兵移勢獨艱縱逐鴟夷淪楚水終歸
馬革葬黔山聲留南國謳吟在路過西州慟哭還家有奇兒
能繼將知公地下破愁顏

當日孤危身岌岌儉人謗毀論紛紛出山不作生還計握節
難麾戰潰軍匣裏龍淵方躍水樓中貝錦尙成文表忠深賴
南豐疏昭雪終能慰

聖君

公殉節後楚北某中丞尙有異詞今相國湘鄉曾公以公死事闕論乃定

望漢陽追悼潤臣觀察

引被哀家禍含悽出九門
淚懸鮫屋箱聲斷鶴鵠原
末路方持節中途趨折轅
錢塘雖未渡免作

國殤魂

大畫殿親在奇編故籍空
高臺惟望子樂府但非翁
鶴化歸無晚烏私憾不窮
何枝堪挂劍淚盡綠楊中

題江上山

劫火難銷戰血腥神焦鬼
爛失精靈十年重泛滄江
權惟有青山識客星

煙波

遲日煙波麗晴雲曳故低峰橫青黛秀岸夾綠痕齊浴鷺羣
相戲歸鴻路不迷村村新水足漸欲事春犁

江行

山情與水思逸興浩無邊綠樹紛相引青皋望已妍壘尋蛇
豕後客在燕鶯前稍見流亡集疲農亦可憐

皖軍募士相屬於道

滄江未息鬪壯士盡長征不得龍驤將徒增鵠岸營宏羊謀
且罄白馬氣猶橫專閭資奇略無爲但益兵

沌口獨步山磴

江皋幾日被和風殘枿依山發故叢爲傍戰場閒獨苦小桃

花澹不能紅

登高望沔鄂

風力橫空厲，濤聲撼地回。
江山信雄傑，鎖鑰在人才。
民未瘡痍復，時方戰伐開。
折衝懷遠略，經武望行臺。

守風屯口

避風來繫木蘭舟，村市蕭條倚酒樓。
幾樹早花明戰地，一江新水送春愁。
自無奇策懷三略，詎有雄談勸五侯。
夙昔詞英零落盡，不堪回首舊賓遊。

捉船行

沿江舟子竊相語，聞道南軍捉船戶。
健兒應募充長征，東下

雷池更鵲浦船頭躍立先拔刀手持軍帖氣勢高紅旗擲出
插船首語汝船戶安敢逃船戶跪垂涕風波恐留滯津渚多
未諳生理憂不繼軍人怒莫當我往無宿糧主將示恤士掠
貨佐行糧大船小船犒縉錢橫搜豪攫盈腰纏軍人醉飽買
歌舞船戶踉蹌哭向天我聞軍興未闕餉舟車權算道相望
師行紀律何爲哉此曹橫掠最無狀沿江今見捉船勇入陣
誰知臨賊恐貪貨仍復惜頭顱增軍百萬徒成冗誰其言之
驟騎營滅賊無求多募兵豈知兵多賊轉多日毒生民將奈
何

雨泊

遠岸沈荒柝逢窗滴未休巖喧宵雨驟溪漲曉雲流染綠林
間透澆紅屋角稠汀濬看漸瀾新浪浴鳧鷗

上中丞嚴公

夏口建軍府壯哉惟鄂州北瞻拱大別翼以黃鵠邱雙川匯
南紀江漢何浮浮俯吳仰巴蜀津通萬里舟節鉞領雄鎮必
資英傑倚城堞昨三陷胡公力戰收折衝靖外侮內政靡不
修獨於寮案列偉公才略優和季薦士行相繼高節樓果聞
峻風采黜陟昭薰猶才鋒決紛滯智炬燭遐幽威動羣民伏
仁覃蔀屋謳申會討軍實固圉先綢繆有時報籌筆扶杜招
來遊賤子忝故舊折簡荷相求媿無智囊策持以佐前籌

國家際多難

王綱仍綴旒羣盜尙反覆莫寬

宵旰憂東討久未克南軍頓石頭願公董士馬形勝臨上流
聲援壯後勁遙助東諸侯一舉蕩吳越盡洗山川羞厥功比
微管天下復宗周吾儕小人輩何患無菟裘

雨中舟泊鄂渚

不辨青燐興碧虹樓臺都化劫灰紅悽涼暗下山川淚灑向
青城煙雨中

上節相官公

星朗三台上雲生六齋邊崇班高百辟偉度冠羣賢風后登

增日姜牙受鉞年荆衡歸鎖鑰湘漢繞旌旃身繫安危望才
兼將相權豐功厓紀石毅力柱承天昔作荆臺鎮時方燧火
連偏裨嘉折首召募奮張拳遂奏龍陂捷

荆郡之全實賴龍陂橋之捷能

安虎帳眠建牙俄有

命轉戰益無前方叔猷原壯條侯壁自堅安州夷賊窟沔北
埽烽煙蛇豕均殲盡牛羊復晏然金湯還版籍樓堞洗腥羶
改紀勞新造造黎釋倒懸總師進貔虎

懋賞耀貂蟬側想勲名盛都由畛域捐岱宗增捧土滄海納
支川丙相寬容著汾陽德量全公忠宏大體獎借略微愆靡
下謀咸用胸中智不專軍皆樂鼻藻策豈棄魚筌鰈使猶懷

惠鮫人亦受塵高情工染翰餘事鬪吟牋謝傅清談興韓公
晚節篇帶裘閒自得競病捷尤妍下走容投刺傾心慕執鞭
車茵當可吐揖客竟相延已喜鄉邦靖猶悲世運遄

朝廷憂未解宇縣禍相挺大業匡無緩

明公力足肩抗稜徵甲士飛檄會戈船星滅機槍酸氛澄牛
女躔丹心扶日月元化翊坤乾江海銷鳴鏑要荒罷控弦振
威清斥堠專澤鬯垓埏驚鷲鳴將應麒麟繪最先

中興恢漢道常武贊周宣赤舄趨

朝列丹書獻御筵老儒逢稷契差不負華顛

烈風不止

焚輪何太甚日夜濟衝風鷓鴣相繼魚龍拔向空
家先策宿動聲發士彘雄誰念羈遊客飄然一轉蓬

巢松臥雪卷子爲周荇農侍講題卽送其還朝

周侯愛畫入骨髓名蹟縱橫散牀几就中松雪卷尤珍巢臥
其間意難已鄂州示我西溪圖奇秀清雄天下無偶嘗一變
識全鼎餘者入網皆珊瑚昔年挾藻玉堂上置身早作神仙
望猶將山水寄閒情每對雲霞憶高尚四海誰知弄甲兵燧
煙日夜照

神京詞臣發憤屢陳疏憑膽披肝答

聖明九門出入警刁斗卻換長裾製短後攬轡方巡貔虎屯

枕戈已遣豺狼走歸來羽檄遍湘東獨掩蓬蒿三徑中日遠
俄傳瑤水駕天高忽泣

鼎湖弓今

皇纂序寰區正

兩宮文母竝仁聖春風促駕行趨

朝夔龍翊運

中興盛叅天南嶽何崔嵬壘產將相皆奇才周侯識略應時
出可調元氣樹斗魁鳳飛九天巢阿閣大厦方資松楸託袁
公豈得臥猶高謝傅徒然眷邱壑從容廊廟贊惟新去矣許

談獻

紫宸憑仗丹青元化手還同魏邴畫麒麟

讀若農侍講近詩率題卷首卽送入都

詞客湘東有雋聲早誇嚴助直承明
酣歌更託金門隱慷慨能談玉帳兵
州鎮傾危才質落關河荒梗涕縱橫
披君一卷憂時作欲激蛟龍劍夜鳴

江城柳色送征鷁威鳳巢痕傍日邊
入告當陳天下計邇英仍侍

禁中筵旁招股武興邦會訪落周成
繼序年啟沃儒臣功不細好將謨訓
釋前編

別伯容參軍

兼旬停短檝朋好斲流連尊酒將離會風花欲暮天人才淪
草莽世運縱戈鋌忽憶江東彥新亭正泫然

航憐憐吾子栖栖從事閒吟情消白日歸夢滿青山文獻存

耆舊

方輯略詩紀略

簪裾謝往還幾時耦耕約沮溺許追攀

謁胡文忠祠

碑並羊開府祠同葛武鄉風雲仍壁壘江漢復金湯昔叨
咨訪迂疏許激昂英靈今始接揖客晚升堂

行經滋陽湖畔

亭館誰家第茫茫瓦礫同廢墻縈慘綠燒枿發媯紅浩劫輕
塵裏濃華斷夢中湖波葬羅綺流恨更何窮

舟中漫興

江轉遙看帆影聚風回徐見浪花分舟中得句青山笑裊裊
飛來贈白雲

贈汪梅村孝廉

世治賢登朝道喪儒在野汪君淵識人精博揜羣雅縱意及
文辭周秦入陶冶哀哉秣陵城埽地陷銅馬奔鼠挈萊妻骨
肉存者寡生平所著錄一炬付殘炮康成晚漂萍伯鸞寄廡
下詩哀嚴鄭公謂胡文忠公君蓋文忠典試所得士老淚中宵瀉瓦屯留碩儒
一綫紹游夏典籍遭散亡仗茲木支厦斯文未墜地長夜燭
堪假我幸覩靈光曷云罄心寫禱昧藉發蒙津逮勿予捨何

日結衡茅相從隱白社

江行望嘉魚諸山

旅客滄江意自閒
歸舟欹枕看青山
望中秀色浮無盡
多在林稍出沒間

繫舟步上赤壁

石力截江流風濤不能裂
其下窟蛟龍未敢縱
吞鬪周郎爾
何人奇勝一炬決
煙燄巖巖壑
草木亦焚蕪
天生江與山
萬古壯扁鰈如何造化靈
不及武威烈
遂使智勇人
千年擅雄傑

癸亥之春重遊鄂渚則同年張仲遠觀察沒滬上逾年矣悽

然感舊遂成一律

自逐鸕輪少嗣音安期蓬島共追尋
槎懸博望天邊節聲散
成連海上琴借箸屢陳憂

國計彫纓長負入山心劇憐喬梓同摧折
一髮空傷墜緒沈
鄂渚重遊獨愴神風流思曼遽先淪
楚詞哀些成孤唱吳語
清談失此人鶴蓋龍門空似市鴻軒
鳳舉竟誰倫歡條俯仰
難重續滬上俄悲宿草春

牡丹乍放困於風雨憮然惜之

吐艷驚無匹俄然風雨俱神仙猶墜落
軒冕且泥塗天亦濃
華如人將讎賞孤盛衰多倚伏非此獨嗟吁

上巳雨中

苦雨過元已鶯花欲送春煙迷挑菜渚波渺采蘭人高會虛
江左清言散洛濱祓除何所冀海宇靖烽塵

春興六首

滄江風雨送春歸頗訝蒙陰與候違青帝不除雲掩蔽黃人
難捧日光輝多方環伺艱虞會初服深求治亂幾馭朽涉川
誰進誠萬年

競業在

垂衣

募士飛芻羽檄傳滔滔江漢繞戈船村墟流血多兵火權算

傾膏有歲年但恃一隅支餽給誰聞三捷掃烽煙相持未決
財先罄卮漏難求不涸淵

十年傾國事東征千里沿江盡列營不惜黃金填壑盡惟期
白骨換功成臨戎誰似曹韋睦未捷何爲渾濬爭莫失乘機
投袂勇涼州謝艾亦書生

曹韋謂曹景宗韋敬也

伏莽關中自累朝花門蹙馬氣雄驍遼東孤將空馳突隴右
羣羌盡動搖况復南山環寇盜頻聞西土困征徭誰知百二
金城險萬落千村莽寂寥

近聞銅馬去燕山散入曹滕兗鄆開巨海清河徒設險臨淄
歷下孰當關時危鄰道援師少途梗諸方餽餽艱烽燧

神京憂密邇洗兵何日慰

龍顏

郡國東南歎久淪中原西北漸荆榛豫州塢壁皆軍壘晉國山河與寇鄰畿輔誰當股肱寄

蔡軍猶乏爪牙臣忽思李郭

中興將唐代艱危大有人

雜舟風雨大作

長天籠野溼雲齊日夜衝巖萬木低道遠但傳風鶴警

時為言麻

城沔陽皆有意林深不斷雨鳩啼溝塍溜入滔滔漲村巷春歸滑滑泥二麥漬傷苗凍損老農垂涕罷耆翠

舍弟子章赴晚需次

汝控雙鳧院口行大江南北未銷兵吏求文武兼成惠民撫
流亡雜戰耕美政早期花滿縣故山當憶杜同生極知干祿
伸烏養豈慕風塵薄宦榮

雨後新漲

雨連旬月久野水漲荒陂曉見魚梁沒宵聞鶴埭移一春恒
道路萬事任盈虧坐惜林芳晚韶華去若馳

雨霽

蹄鴉聲中春又歸風風雨雨送芳菲林煙乍散溪流急濕盡
楊花未得飛

悲來行

嗟乎昊天何疾威霖雨連月滄陽輝青青陵陂麥欲爛稻苗
凍損豆夾稀軍興徵調久未息入夏黿鼉厯澤國不死橫流
當死饑悲來豈復憂兵革

逢窗雨坐

臥看煙水長蘼蕪鎮日停撓意鬱紆漠漠雲陰濃閣岸沈沈
雨色散歸湖空曾暗躍衝波鯉遠渡斜翻浴浪鳧春盡餘寒
仍惻惻只疑秋氣入菰蘆

苦雨

滂沱連月雨真宰進羣陰無石補天漏何人援陸沈舟車頻

歲算鼓角萬方音農命懸如此難爲禹稷心

阻風三湖

吾生任行止適與坎流同泛卽支機石飄猶捲地蓮衝颺徒
退鷁豪氣尙凌虹爲向飛廉道無矜跋扈雄

紀異

司天任箕畢二曜匿精靈帝豈安茫昧人誰測杳冥濡鵝疑
在位狂兇久逃刑災異能推類江都合引經

湖上

日日征人艤櫂多西來湖上足風波隄腰無限紅心草泣雨
啼煙奈若何

雨渡長湖奇燿卿

風濤荒谷壯煙雨渚宮遙春讌孤花事離心結柳條故人久
凝望旅客尙飄搖一卷江山作高吟興自超